

ODRŽANA 10. REDOVNA SKUPŠTINA UDRUŽENJA ZA ZAŠTITU TEKOVINA BORBE ZA BIH

USPJEŠNA GODINA

U Sarajevu je 7. juna ove godine održana 10. redovna Skupština Udruženja za zaštitu tekovina borbe za Bosnu i Hercegovinu na kojoj je usvojen izvještaj o radu za preteklih godinu dana, te donesen plan rada za ovu godinu. Takođe je donesena odluka o ukidanju Fondacije za pomoć porodicama pripadnika Oružanih snaga BiH procesuiranim u Hagu. Skupština je za nove članove Predsjedništva Udruženja izabrala Osmana Čengića i Šefku Hodžića, a za novog sekretara Skupštine Rasima Hodžića.

Učenjem Fatihe odata je počast poginulim pripadnicima Oružanih snaga RBiH i umrlim članovima Udruženja. Posebna počast je odata rahmetli Asafu Džaniću, dugogodišnjem članu Predsjedništva Udruženja, predsjedniku Komisije za izdavaštvo i glavnom uredniku Koraka, koji je iznenada umro jaunara ove godine. Delegacija Skupštine je posjetila njegov mezar i položila cvijeće.

Sjednicom je predsjedavao predsjednik Skupštine prof. dr. Mesud Hadžialić, a uvodno izlaganje o radu Udruženja između dvije Skupštine, odnosno od 9. juna prošle do 7. juna ove godine, podnio predsjednik Udruženja general Mustafa Polutak.

General Polutak je kazao kako je Udruženje, zajedno sa državnim i drugim institucijama, učestvovalo u rješavanju socijalnih i drugih pitanja boračke populacije, te na njegovanju tekovina borbe za Bosnu i Hercegovinu. Udruženje je, dodao je, sudjelovalo i na svim sastancima i aktivnostima Koordinacionog odbora 16 boračkih udruženja na nivou Federacije Bosne i Hercegovine na kojima se raspravljalo o statusu boraca, vojnih penzionera i boračke populacije u našem društvu.

„I pored nepovoljne finansijske situacije“, naglasio je general Mustafa Polutak, „Udruženje je nastavilo sa tradicionalnim aktivnostima na obilježavanju značajnih događaja i ličnosti iz rata za odbranu Bosne i Hercegovine. Udruženje je i ove godine bilo nosilac obilježavanja 8. aprila, Dana Teritorijalne odbrane Republike Bosne i Hercegovine, te je tom prigodom organiziralo svečanu akademiju u Domu OS BiH. Toga dana položeni su vijenci na spomen kompleksu Kovači i ispred Vječne vatre u Sarajevu. Sudjelovali smo i u obilježavanju 15. aprila – Dana Armije RBiH i pratećim manifestacijama. Članovi Udruženja su 16. aprila ove godine obilježili drugu godišnjicu smrti generala Rasima Delića.“

General Polutak je dodao da je Udruženjem za zaštitu tekovina borbe za BiH Kantona Sarajeva krajem oktobra 2011. organiziralo „čas istorije“ za učenike Pete gimnazije iz Sarajeva na

Nišićkoj visoravni, koja je tokom rata bila poprište intenzivnih borbenih dejstava. TV Sarajevo je objavila zanimljivu reportažu o ovom događaju: detaljno su predstavljeni sadržaji manifestacije na Nišićkoj visoravni, te afirmisani napori Udruženja da se mladim generacijama prenese iskustva i sjećanja na borbu za odbranu BiH.

(Inače, ovaj čas istorije na Nišićkoj visoravni učenicima i nastavnicima Pete gimnazije održao ju predsjednik Udruženja Mustafa Polutak).

„Kao i ranije“, rekao je general Polutak, „naše Udruženje je učestvovalo u obilježavanju manifestacije „Odbrana BiH - Igman 2011. godine“. Sa ostalim boračkim udruženjima učestvovali smo u obilježavanju i drugih značajnih datuma i ličnosti, posebno godišnjica poginulih i umrlih komandanata i drugih starješina ARBiH. Više članova našeg Udruženja referatima je doprinijelo uspješnom organizovanju međunarodne konferencije „Politički i vojni značaj odbrane Sarajeva“. U saradnju sa Bošnjačkim institutom Udruženje je održalo „okrugli sto“ o temi „Bilans rata u BiH“.

Polutak je govorio i o radu nekih kantonalnih udruženja za odbranu tekovina BiH. U vezi s tim spomenuo je Udruženja ZA TEBE BiH Srednjobosanskog kantona, koje je u proteklih godinu dana organizovalo dva značajna „okrugla stola“. U okviru prvog - „Džehenem u Srednjoj Bosni“, obrađeni su ratni događaji iz 1993. godine, a drugog – „Srednja Bosna prkosna“, događaji iz predratne 1991. i ratne 1992. godine.

Podsjetio je i da je Kantonalni odbor „ZA TEBE BIH“ Hercegovačkoneretvanskog kantona obilježio godišnjicu Bitke za Podveležje, te da je na ovoj manifestaciji učestvovalo i Udruženje za zaštitu tekovina borbe za BiH.

Govoreći o izdavačkoj djelatnosti Udruženja general Polutak je naglasio da se ona odvijala u skladu sa planom. To se, prije svega, kako je kazao, odnosi na časopis „Korak“, koji redovno izlazi u tiražu od 1.000 primjeraka.

„Koliki je uticaj ovoga časopisa i izvan granica naše zemlje“, kazao je on, „svjedoči i podatak da su četnički hakeri napali web stranicu Udruženja, na kojoj se nalaze arhivski brojevi časopisa od njegovog prvoga broja, kako bi onemogućili njihovo korištenje od strane zainteresiranih istraživača i najšire javnosti.“

Polutak je kazao da je Udruženje u prošloj godini objavilo knjige „Specijalni rat protiv Bosne i Hercegovine“ generala Fikreta Muslimovića i „Paradržavne tvorevine – oslonci uništavanja Bosne i Hercegovine“ generala Hasana Efendića, te, u saradnji sa Udruženjem za zaštitu tekovina borbe za Bosnu i Hercegovinu Srednjobosanskog kantona knjigu mr. Muniba Kajmovića pod naslovom „48 sati pepela“.

Iz izvještaja o radu Udruženja, Polutak je naveo i sljedeće:

U saradnji sa Fondacijom **Kantona Sarajevo za izgradnju i očuvanje grobalja šehida i poginulih boraca, memorijalnih centara i spomen-obilježja žrtava genocida**, objavljen je zbornik radova sa „okruglog stola“ o 1993. godini kao prelomnoj za odbranu Bosne i Hercegovine, održanog 21. septembra 2010. godine u okviru manifestacije „Odbrana Bosne: Igman 2010“. Takođe, Udruženje je u saradnji sa Udruženjem za zaštitu tekovina borbe za Bosnu i Hercegovinu Srednjobosanskog kantona objavilo zbornik radova sa „okruglog stola“ o 1993. godini kao prelomnoj godini rata na području srednje Bosne, pod naslovom „1993: Džehenem u srednjoj Bosni“. Štampan je i zbornik radova sa „okruglog stola“ „Bilans rata za odbranu Bosne i Hercegovine“, održanog 23. juna 2011. godine.

Udruženje je objavilo separat „Razvoj odbrambeno-oslobodilačkih snaga Bosne i Hercegovine u periodu 1992.-1995.godine“, koji je uradio general Avdulah Kajević.

U saradnji sa Gazi Husrevbegovom medresom u Sarajevu, Udruženje je priredilo izložbu kanadskih arhitektica Lejle Odošić i Liane Bresler pod nazivom „Jerusalim/Sarajevo: Go-Between Cities“. Izložba je otvorena 27. maja 2011. godine i trajala do 20. juna.

Udruženje je bilo domaćin prikazivanja dokumentarnog filmskog iranskog reditelja Reze Burdžija pod naslovom „Majke Srebrenice“, koje je organizovano u sali općine Stari Grad i Kulturnom centru Vogošća 16. i 19. jula ove godine. Film je prikazala i TV Vogošća.

Udruženje je i u prošloj godini prikupljalo video i pisane materijale za knjige o narodnim herojima 1992.-1995. godine, što je, inače, trajni zadatak Udruženja.

Polutak je kazao kako je Udruženje u prošloj godini radilo onoliko koliko su mu omogućavala finansijska sredstva. A bila su to, kako je kazao, mala sredstva, koja su trošena racionalno.

Skupština Udruženja je ukinula Fondaciju za pomoć porodicama pripadnika Oružanih snaga RBiH u Hagu, jer se u Haškom tribunalu više ne sudi i neće se suditi ni jednom pripadniku Oružanih snaga RBiH, ali je obavezala Udruženje da, prema svojim mogućnostima, pomaže pripadnicima OS RBiH procesuiranim pred sudovima u Bosni i Hercegovini.

Skupštini je usvojila dosta ambiciozan plan Udruženja. Pored podrške jačanju institucija države BiH, ustavnim promjenama i ulasku zemlje u evroatlantske integracije, reformskim procesima u BiH, podrške borcima u poboljšanju njihovog statusa, sudovima u procesuiranju ratnih zločina, obilježavanju značajnih događaja i ličnosti iz našeg odbrambenooslobodilačkog rata, Udruženje u narednih godinu dana planira nekoliko značajnih projekata.

Iz domena naučnog valorizovanja tekovina borbe za BiH, Udruženje će se angažovati za dovršenje projekta „Vojna iskustva iz rata 1992.-1995. godine“ i štampanje separata o tome. Predviđeno je održavanje nekoliko „okruglih stolova“, među kojima o paradržavnim tvorevinama u funkciji ratnog uništenja RBiH i 1995. kao završnoj godini u ratu za odbranu BiH. Timovi Udruženja nastaviće prikupljati građu za knjige o herojima Safetu Zajki i Izetu Naniću. Do kraja ove godine Udruženje namjerava objaviti drugo, prošireno izdanje knjige generala Hasana Efendića „Mudžahedini u Bosni i Hercegovini“.

Naravno, Udruženje će i u narednoj godini redovno izdavati časopis „Korak“.

Kao i do sada, članovi Udruženja za zaštitu tekovina borbe za BiH, organizovaće „časove istorije“ na kojima će mlade generacije, kad im je to uskraćeno u školama, saznavati istinu o našem odbrambenooslobodilačkom ratu.

Š. H.